

Apa Keuntungan dan Kerugian Adanya Undang-undang Pertadbiran Hukum Islam (1965) di Singapura?

Rang Undang-undang Pertadbiran Hukum Islam (1965) telah dikemukakan ke dalam Parlimen Singapura oleh

Menteri Kebudayaan dan Hal Ehwal Masyarakat pada bulan Disember 1965 dan bacaannya yang kedua telah

disahkan lalu diserahkan kepada Jawatankuasa Pilihan yang meminta orang ramai memberi fikiran, syor dan

pendapat mereka tidak lewat dari 24 Januari 1966 tetapi dengan permintaan orang ramai Islam, masa

penutupan itu ditangguhkan hingga 28 Februari 1966. Rang undang-undang itu dikemukakan di dalam bahasa

Inggeris — tidak ada terjemahan Melayunya.

Tiap-tiap seorang Islam diberi peluang untuk memberi pendapatnya kepada *Select Committee* itu, dan apabila ia telah mengemukakan pendapat, fikiran dan syornya terhadap undang-undang itu dan bersedia memberi pendapat itu kepada Jawatankuasa Pilihan maka bagi seseorang itu menjadi suatu kesalahan menyiaran kandungan-kandungan apa yang dikemukakannya itu kepada am. Tetapi seseorang boleh memberi fikiran di luar dari majlis untuk mengulas dan memberi pendapat-pendapatnya kepada awam jika tidak ia mengemukakan dirinya untuk memberi pendapat-pendapatnya di hadapan Jawatankuasa Pilihan itu.

Rang undang-undang itu mengandungi sepuluh bahagian iaitu (1) Pendahuluan, (2) Majlis Agama Islam, (3) Mahkamah Syariah, (4) Kewangan, (5) Masjid dan Sekolah Agama, (6) Kahwin dan Talak, (7) Harta, (8) Memeluk Agama Islam, (9) Kesalahan-kesalahan dan (10) Lain-lain Hal atau Rampaian.

Di dalam rencana ini kita akan mencuba memberi penjelasan dengan sejelas-jelasnya, untuk panduan kaum Muslimin, akan apa yang akan dihadapi oleh umat Islam dengan adanya rang undang-undang ini serta cuba memberi fikiran dalam perkara-perkara yang kita pandang mungkin akan

berlaku, jika tidak dijaga dan dihalusi lebih dahulu kedudukannya. Bahkan di dalam setengah-setengah kandungan hanya ada sedikit perubahan daripada rang undang-undang tahun 1960 yang telah ditolak oleh umat Islam dalam sidangnya pada 15 April 1961 yang menyebabkan rang undang-undang itu ditarik semula “untuk disemak”. Juga pada tahun 1963 rang undang-undang itu dikemukakan oleh Majlis Penasihat Islam meminta fikiran badan-badan Islam dalam soal-soal itu tetapi walaupun begitu segala fikiran yang dikemukakan oleh badan-badan itu hampir-hampir tidak ada barang sedikit pun diterima untuk pindaan kepada rang undang-undang yang dikemukakan pada tahun 1965 yang boleh dipandang bahawa pihak yang mengemukakan rang undang-undang itu tidak menerima tuntutan kaum Muslimin yang menghendaki disemak dengan wajarnya sebelum dikemukakan semula dan kerana itu kaum Muslimin hendaklah berhati-hati di dalam memberi fikirannya dan semolek-moleknya bersatu suara di dalam menghadapi rang undang-undang yang bakal mengenai mereka — tidak kepada orang lain.

Taraf Majlis

Perkara yang besar sekali yang kita rasa patut

diperhatikan ialah tentang taraf Majlis Agama Islam yang bakal didirikan apabila sahaja rang undang-undang Islam itu disahkan. Bagi umat Islam adalah diwajibkan berjalan pada jalan Allah dan bagi umat Islam adalah disuruh memilih tidak lain agama, selain agama Islam, agama Allah, untuk mereka. Dengan ini, maka tugas mereka adalah menjunjung dan mendaulatkan hukum syarak dan tidak ada hukuman yang lain yang bakal diterima oleh mereka selain daripada hukum syarak.

Menurut rang undang-undang yang dikemukakan itu maka taraf Majlis Agama Islam di dalam negara Republik Singapura — yang tidak ada mempunyai ketentuan agama rasminya — meletakkan majlis itu sebagai suatu perbadanan (*corporation*) yang tarafnya tidak lebih daripada kedudukan perbadanan-perbadanan seperti *Telephone Board*, *Haber Board*, perumahan (*Singapore Improvement Trust*) dan seumpamanya. Segala perundangan-perundangan yang dibuat oleh badan-badan seperti ini tidak lulus melainkan diluluskan oleh parlimen sesudah dibahaskan dan demikian itulah kedudukannya Majlis Agama Islam yang bakal ditubuhkan itu yang akan bertanggungjawab kepada hukum-hukum syarak Islam yang akan dilaksanakan kepada umat Islam, sedang anggota parlimen yang bertanggungjawab di dalam membahas persoalan umat Islam itu tidak terjamin akan ada umat Islam yang berkelayakan di dalam soal ini.

Umat Islam patutnya menyetujui hanya taraf majlis itu sebagai sebuah “*Legislator*” (Perundangan) yang akan bertanggungjawab melaksanakan khas mengenai hukum Islam kepada orang-orang Islam untuk orang-orang Islam sahaja.

Taraf Yang Dipertua dan Anggota Majlis

Menurut rang undang-undang ini majlis itu mengandungi:

1. Seorang Yang Dipertua dilantik oleh *President Republik Singapura*.
2. Mufti.
3. Tidak lebih daripada lima orang ahli yang dilantik oleh *President Republik Singapura* dengan syor menteri yang terdiri dari bekas ahli-ahli parlimen.
4. Tidak kurang dari tujuh orang ahli yang dilantik oleh *President Republik Singapura* daripada pilihan dikemukakan oleh Yang Dipertua Majlis. Pilihan-pilihan yang dikemukakan oleh Yang Dipertua Majlis itu kepada *President Republik Singapura* adalah terdiri daripada orang-orang yang dipilih oleh badan-badan Muslimin yang diminta oleh majlis mengemukakan nama-namanya.

Lama pilihan itu bagi tiga tahun dan boleh dipilih semula dan orang-orang yang dipilih itu mestilah umurnya lebih dari 25 tahun dan ia seorang Muslim. Setiausaha bagi majlis itu adalah seorang Muslim pegawai kerajaan dan dilantik oleh menteri dan ia berhak hadir di dalam semua mesyuarat tetapi tidak ada hak mengundi.

Kemosykilan dan Syak

Jika diperhatikan pilihan ke atas pegawai-pegawai pentadbir Majlis Agama Islam Singapura itu, jelas bahawa Yang Dipertua Majlis yang akan dilantik itu namanya akan dikemukakan oleh Perdana Menteri kepada *President* yang tentunya, walau siapa pun memerintah, akan memilih orang-orang yang sekurang-kurangnya “sefaham” atau “yang boleh bekerjasama” dengan kerajaan yang memerintah ataupun pegawai-pegawai pemerintah yang difikirkan “yang dipercayai” oleh kerajaan yang memerintah.

Di dalam ahli majlis yang dirancang nampaknya

mengandungi 12 orang sekurang-kurangnya 5 daripadanya akan dilantik oleh menteri dari anggota parlimen yang apabila dilantik mestilah meletakkan jawatannya daripada keanggotaan di dalam parlimen — ertiinya orang-orang ini adalah menjadi “orang-orang kerajaan” yang memerintah yang akan “menguasai” majlis itu di dalam setiap langkahnya beserta 7 orang anggota-anggota yang nama-namanya dikemukakan oleh Yang Dipertua Majlis (pilihan kerajaan) yang diambil daripada wakil-wakil badan-badan yang ditentukan atau disetujui oleh majlis sama ada tiga, empat orang dari satu badan atau semua sekali dari satu badan yang tujuannya lahir bahawa majlis itu akan nanti meliputi golongan-golongan yang hanya disetujui oleh kerajaan atau ringkasnya orang-orang yang boleh dipandang menyebelahi kerajaan semata-mata seperti adanya pilihan-pilihan pada masa yang lalu di dalam memilih anggota-anggota Majlis Islam Penasihat Kerajaan Singapura sama ada di dalam masa penjajah atau pun sesudahnya.

Lantikan yang serupa ini, menurut pendapat kita, patut difikirkan dengan saksama kerana majlis ini akan menjadi saluran di antara kerajaan dengan umat Islam yang nampaknya boleh digunakan untuk “mengekang” ataupun barangkali boleh juga dijadikan saluran untuk “menindas” segala gerak-geri umat Islam di dalam negara ini supaya tidak bergerak dengan wajarnya dan supaya tidak bergerak di dalam perkara-perkara agamanya dengan bebas seperti yang terjadi di dalam kongkongan agama di dalam negeri-negeri di Tanah Melayu di dalam mengajar, bersyarah dan lain-lainnya — mereka boleh menggunakan kuatkuasa undang-undang atas orang-orang yang tidak “diperkenani” oleh kerajaan; dan mungkin kelak menghendaki bahawa agama Islam itu adalah untuk beribadah semata.

Untuk perhatian umat Islam khususnya di Singapura, lantikan yang serupa ini, kita pandang, bukanlah lantikan secara demokrasi — jauh sekali

mengikut lantikan yang diajarkan oleh Islam. Sepatutnya, sepanjang ajaran Islam yang kita ketahui, pilihan-pilihan itu hendaklah datangnya dari pilihan orang-orang Islam sendiri dan calon-calon yang bakal dilantik bagi menjadi anggota majlis itu hendaklah dicalonkan oleh orang-orang Islam — bukan calon itu mencalonkan dirinya sebagai yang berjalan di dalam pencalonan ala barat di dalam mana seorang yang menghendaki masuk ke dalam majlis itu mencalonkan dan mendakyahkan dirinya di hadapan khalayak ramai sekalipun ia boleh jadi seorang penipu dan tidak berkelayakan.

Menurut cara Islam bahawa seseorang yang mengetahui kebolehan, kelayakan dan kebaikan akhlak dan kejujuran seseorang hendaklah mencalonkan orang itu dan menjamin serta menjelaskan keadaan-keadaan itu kepada ramai dan tidak ada “*canvassing*” untuk mendakyahkan diri orang itu dengan kata-kata — “Akulah yang layak, yang patut, dan akulah berkebolehan” dan mengadakan janji-janji yang palsu seperti yang ditiru dari demokrasi Barat hari ini. Tiap-tiap orang Islam yang bermastautin bolehlah melantik nama-nama yang telah dikemukakan itu dan tempat-tempat lantikan itu boleh diadakan di kariah masjid masing-masing dan apabila sempurna lantikan itu pulangkanlah kepada orang-orang yang telah dilantik, menurut cara Islam itu memilih ketuanya sendiri daripada mereka yang dilantik, kemudian anggota majlis itu meminta kepada kerajaan bagi melantik seseorang setiausaha majlis daripada kakitangan kerajaan yang beragama Islam untuk melaksanakan keputusan di dalam pentadbiran majlis itu.

Kupasan-kupasan di Dalam Lain-lain Perkara

Takrif Hukum Islam.

Di dalam rang undang-undang itu tidak ada takrif dibuat terhadap hukum Islam. Perkara ini, dengan tidak ada (Sambungannya di muka 30)